

**Ignazi Venzin, Selva**

\* 11 d'avrel 1936 - † 15 d'avrel 1961

Ina jamna da lavur era puspei ida da rendiu, ed il di da ruaus ed oraziun s'approximava, che la mort ha terminau cun furtina il viadi terrester d'Ignazi els onns d'ina giuventetgna plein speronzas e curascha. Puspei ei il human perdetga, che Sirach ha aunc oz raschun sch'el admoneschia gia el veder testament: «Patratga, che la mort targlina buc». Era Ignazi ei daventaus l'unfrenda dallas numerusas disgrazias dil traffic sin via. Era el banduna sur ura ses cars da casa e tuorna buca pli sil plaz da lavur. Cun premura havea el frequentau avon paucs meins las devoziuns e tedlau ils priedis dalla sontga missiun. Tgi havess detg che quella missiun culla devisa: «Salva ti'olma», vegni ad esser l'ultima preparaziun pil viadi ella perpetnidad! Ignazi ei spartius anetgamein e ha fatg da saver, ch'ils dis dalla veta humana ein gleiti dumbrai.

(Giuvens romontschs sparti memia baul da sur S.Berther, Breil; CR 1962, pag.57)